



NOVAS DA LAAX – INFORMAZIONI DALLA VISCHNAUNCA

Cun questa ediziun lantschein nus il niev format da publicaziuns **Novas da Laax**. Mintgamai alla fin dil meins rapportein ed informein nus da fatgs interessants, attractivs, impurtonts e meins impurtonts ord casa communal e dallas uniuns. Cun quei fegliet meinsil vulein nus tener sil current la populaziun e comunicar da quei che marscha davon e davos las culissas. Las Novas da Laax remplazzan buca las comunicaziuns ufficialas ni autras. Quei mied duei plitost porscher ina plivalur informativa e divertenta per habitonts indigens e secundars sco era per nos hosps. Sche Vus duessas haver munchentau la gasetta stampada ei quei negin problem: Las Novas da Laax san ins leger naven d'immediat era online silla pagina d'internet dalla vischnaunca, naturalmein en romontsch e tudestg. E sche Vus vulesas rapportar fatgs interessants da Voss'uniun, lu dei part. Nus selegrein da Vossas propostas, Vos impuls e da resuns sillas Novas da Laax. Jeu giavischel a Vus bien divertiment cun quei niev mied d'informaziun!

*Franz Gschwend
president communal*



Cun quei link haveis Vus access allas
«Novas da Laax» en romontsch e tudestg.

IMPRESSUM:

Novas da Laax, Vischnaunca Laax
Publicaziun: Mintgamai la davos
ediziun dil meins
Ideas per tematicas: mintgamai tochen
ils 10. dil meins
Redacziun: Domenica Flütsch
Contact: admin@laax-gr.ch

OCCURRENZA DA BEINVEGNI PER HABITONTS NOVS



Sera da cumpignia cun apéro e tscheina.

Da bellezza aura da stad ha il president communal Franz Gschwend saviu beneventar ils 11 da zercladur 2022 rodund 80 «novas e novs» habitontas e habitonts da Laax all'occurrnza da beinvegni. Da buna luna ein quels s'entupai culs representants dallas autoritads e dallas uniuns dil vitg. Demai che l'occurrnza ha stuiu vegnir annullada ton il 2020 sco il 2021 ein gest pliras annadas da nievdomiciliai vegni el Laaxerhof a Murschetg per tedlar e suandar las presentaziuns. Silsunter han las gruppas mischedadas e multifaras astgau entrar ella Senda dil Dragun. En bun'atmosfera ein ils novs commembers dalla vischnaunca arrivai en gruppas pintgas e grondas ell'ustria Bi Blau pigl apéro e la tscheina cumadeivla. Pli che 230 habitonts han priu domicil dapi il 2020 a Laax, entgins ein returnai ella patria, auters ei sedecidi da buca pli bandunar Laax suenter in temps sco stagiunaris. E puspei auters han brattau lur domicil da vacanzas cul domicil stabel. Silla damonda tgei ch'els giavi-

schien dalla vischnaunca, ha ina persuna manegiau surriend: «Ch'ins emblidi da strihar nus dalla gliesta dils envidai per l'occurrnza da beinvegni. Nus havein giu in suentermiezgi perfetg ed empriu d'enconuscher glied interessanta». Ed in pèr giuven ha getg cun fatscha tarlischonta: «Giu Turitg havevan nus retschiet marcas per la dismessa da rumians. E cheu vegnin nus envidai e pupergnai, quei ei bein la detga differenza!» Il president communal Franz Gschwend ha giu plascher da tons indigens novs e cuntents. «Nus vulein gidar da sliar la tema d'entrar en contact in cun l'auter. Cheu a Laax dueien ins saver s'entupar a moda semplia e luca, era cullas autoritads. Las novas habitontas ed ils novs habitonts dueien sesentir beinvegni. Vitier tut ein las componentas socialas silmeins schi impurtont sco la part informativa da quell'occurrnza. Cun seser ensemen da cumpignia e s'emprender d'enconuscher sentan ins bia pli tgunsch tgei che muenta la glied.

NOVAS DA LAAX

Monatliches Informationsbulletin mit Aktuellem aus Verwaltung und Vereinen

PRO LAAX – PER VUS



Da seniester: Claudio Coray (president 2006-2015), Eugen B. Hangartner (1974-1994), Natalia Gliott (1999-2003), Erwin Ardüser (2003-2006 e dapi 2015), Peder Camathias (1994-1999).

(ea) Avon gleiti 50 onns, numnadamein 1974, ei la Fundaziun Pro Laax naschida. Che la radunonza communal ha da lez temps decidu d'installar quella, san ins numnar curaschus ed innovativ. El statut da fundaziun ein las incumbensas dalla Pro Laax stipuladas sco suonda:

- Promoziun da stentas culturalas ed infrastruttura ella vischnaunca da Laax;

contribuziuns a personas ed organizaziuns che tgiran e promovon la cultura, isonzas, tradiziuns, en special il lungatg romontsch, sco era contribuziuns ad uniuns sportivas.

- Acquist da beins cun la finamira da mantener edificis e parcelas da muntada speciala e segirar terren per praticar sport.

OCCURRENZA D'INFORMAZIUN FUSIUN DA VISCHNAUNCAS

Il 25 da zercladur 2022 ha in grond diember d'indigens dau suatientscha agl invit dallas vischnauncas Laax, Sagogn e Schluein. Sill'Alp Plaun han els seschau informar d'emprem maun dil stan dil project da fusiun. Da bun'aura da stad han ils participonts gudiu gl'apéro, silsunter han ils responsabels informau detagliadamein dallas lavurs preparatoricas. Sebasond silla situaziun actuala ed il svilup ellas treis vischnauncas han els presentau ils motifs d'ina fusiun pusseivla, plinavon han els rendiu attent allas finamiras strategicas ed allas cundiziuns empalontas, presentau gremis involvai e gruppa da la-

vur. Bia spazi han ins dau al concept dalla nova vischnaunca ed alla realisaziun concreta dallas diversas spartas, naven dils organs communal, l'administraziun e tuts secturs relevant. Naven dalla scola, cultura, baselgia, socialesser ed ambient, sur il turissem e las finanzas han ins explicau ils avantatgs, ha declarau schanzas e sfidas. Igl ei stau la basa per discussiuns fetg interessantas. La presentaziun detagliada anflan ins ella pagina d'internet dalla vischnaunca.

www.laax-gr.ch/aktuelles

- Planisaziun, construcziun e contribuziuns per indrezs publics da sport. Contribuziuns per mantener substanza architectonica preziosa, protecziun da terren sco era concepziun e formaziun sin territori dalla vischnaunca da Laax.
- Sustegn per lavurs preziasas, prestaziuns e lavurs d'artists – als quals appartegnan era representants dalla litteratura, dalla poesia e musica, sco era sustegn da sportists.

Informaziuns en connex cun la fundaziun Pro Laax, ses projects e la cultura en nies vitg ein d'anflar sin la pagina d'internet www.prolaax.ch

EXTRACT DIL PROGRAM DA STAD

Fiera dil vitg a Laax, 30 da fenadur 2022

Suenter ina pausa da dus onns astgan ins puspei spassegiar amiez il vitg tras la fiera e fuffergnar als differents stans. La biala fiera da stad ei uonn per la 30avla gada ed ils visitaders astgan selegrar d'ina purschida multifara cun specialitads, artisanadi, ustria e divertiment musical.

Tura dil vitg e guidadas el museum, 4 e 18 d'uost 2022

La guidata dil vitg muossa fatgs interessants sco era enqual object zuppau. Ella finescha cun ina viseta tras il museum local.

Teater e concerts

11-8: Origen «Il signor Manichetti»

12-8: serenada sil Lag Grond, cun trumpettas, tgietschen dalla sera e tizuns.

15-8: Sunatibas

19-8: concert cun Kemal Akcag ed orchester

24-8: concert dalla Kammerphilharmonie Grischun

Program d'affons

Il program variont per affons porscha curs da malegiar, giug e divertiment cun frisbee, ballareit e bia auter.

Il program da stad cumplet ei vegnius tarmess a tuttas casadas. Tuttas occurrenzas anflan ins online ella reit, www.flimsllaax.com/events